



Buletin

Syawal 1446H/April 2025

ACIS

Syawal: Menjaga Adab, Merai Ibadah



eISSN 2600-8289



9 772600 828001

Syawal Bulan Pembuktian Taqwa



Oleh:

Nor Saadah binti Musa

Pensyarah, Akademi Pengajian Islam
Kontemporari (ACIS) UiTM Cawangan Negeri
Sembilan Kampus Seremban.

Syawal sering diraikan sebagai bulan kegembiraan dan kemenangan setelah sebulan berpuasa di bulan Ramadan. Hakikatnya, Syawal bukan sekadar simbol kemenangan, tetapi lebih penting sebagai medan pembuktian terhadap tahap taqwa yang dibina melalui latihan intensif dalam madrasah Ramadan. Bulan Syawal berperanan sebagai ujian awal bagi menilai sejauh mana kesan tarbiah Ramadan diterjemahkan dalam kehidupan pasca-Ramadan. Melalui pendekatan al-Quran, hadith, serta refleksi sosial dan spiritual, artikel ini menekankan keperluan meneruskan kesinambungan amal serta memperkukuh ketakwaan sebagai matlamat tertinggi ibadah puasa.

Pengenalan: Ramadan sebagai Madrasah Taqwa

Ramadan adalah suatu institusi pendidikan rohani yang istimewa. Allah SWT menyatakan dengan jelas tujuan diwajibkan puasa di dalam al-Quran yang bermaksud:

"Wahai orang-orang yang beriman! Diwajibkan ke atas kamu berpuasa sebagaimana diwajibkan atas orang-orang sebelum kamu, agar kamu bertakwa." (Surah al-Baqarah: 183)

Taqwa merupakan matlamat utama yang diharapkan daripada puasa iaitu perasaan takut dan pergantungan yang tinggi kepada Allah, komitmen terhadap kebenaran, serta keikhlasan dalam amal. Justeru, selepas 30 hari menjalani latihan spiritual yang mendalam, Syawal berperanan sebagai titik permulaan bagi menguji sejauh mana penghayatan taqwa itu direalisasikan dalam kehidupan seharian.

Imam al-Ghazali dalam *Ihya' Ulum al-Din* menyatakan:

"Puasa bukanlah sekadar menahan diri daripada makan dan minum, tetapi menahan anggota daripada maksiat, dan jiwa daripada kehendak yang hina."

Syawal: Dari Simbol Kemenangan ke Realiti Taqwa

Secara sunnahnya, kita dituntut meraikan bulan Syawal dengan penuh kesyukuran dan kegembiraan sebagai tanda kemenangan. Namun, kemenangan yang dimaksudkan bukan bersifat fizikal atau material semata, sebaliknya bersifat batiniah dan spiritual. Ia adalah kemenangan menundukkan nafsu, meningkatkan disiplin diri, serta mendidik jiwa untuk taat kepada perintah Allah. Rasulullah SAW bersabda:

"Sesiapa yang berpuasa Ramadan dengan penuh keimanan dan pengharapan, maka akan diampunkan dosa-dosanya yang terdahulu." (Riwayat al-Bukhari dan Muslim)

Hadis ini menggambarkan bagaimana Ramadan menyediakan peluang penyucian jiwa, manakala Syawal

menjadi penanda aras untuk menilai keberkesanan penyucian tersebut. Maka, individu yang benar-benar mendapat pengampunan Allah SWT akan meneruskan kehidupannya dalam keadaan lebih taat, lebih sedar, lebih peka dan lebih bertanggungjawab terhadap Allah SWT.

Ibn Rajab al-Hanbali dalam kitab *Lata'if al-Ma'arif* menyebut:

"Bukanlah ganjaran bagi orang yang beramal di bulan Ramadan itu berakhir dengan Ramadan, tetapi ganjaran itu ialah terus kekal di jalan ketaatan selepas Ramadan."

Kata-kata hikmah tersebut menekankan bahawa amalan selepas Ramadan mencerminkan kualiti sebenar taqwa yang telah dibentuk. Jika seseorang kembali kepada kelalaian, maka latihannya di bulan Ramadan belum membuahkan hasil sebenar. Berapa ramai manusia yang memasuki bulan Ramadan dan berpuasa tetapi hanya mendapat lapar dan dahaga sedangkan dosa-dosanya tidak diampuni, na'uzubillah. Hal demikian bertepatan dengan sabda Rasulullah SAW bermaksud;

"Berapa ramai orang yang berpuasa dengan hasil daripada puasanya (hanya) lapar dan dahaga." (Hadis riwayat Ahmad)

Taqwa dalam Konteks Pasca-Ramadan

Taqwa bukan semata-mata perasaan atau niat di dalam hati. Ia menuntut tindakan berterusan dan pembuktian melalui amalan selepas Ramadan. Syawal menjadi waktu penting penanda aras beberapa perkara:-

1. Konsistensi amal ibadah: Adakah solat berjemaah, tilawah al-Quran, qiyamullail dan sedekah diteruskan selepas Ramadan?
2. Kemurnian akhlak: Adakah sikap sabar, rendah hati, dan menjaga lidah masih dikekalkan?
3. Hubungan silaturrahim: Adakah budaya saling memaafkan dan ukhwah sesama insan diteruskan atau sekadar ritual Aidilfitri?

Semua persoalan tersebut merupakan 'check list' muhasabah yang wajar ditanya kepada diri setiap individu muslim, supaya tujuan Allah SWT menganugerahkan Ramadan tercapai dan disempurnakan dengan tepat seperti yang Allah SWT kehendaki. Tanpa kesinambungan ini, maka tarbiah Ramadan akan menjadi sia-sia. Seorang *salafus soleh* pernah berkata:

"Sesungguhnya tanda amal itu diterima ialah apabila ia diikuti dengan amal soleh yang lain."

Ini menunjukkan bahawa taqwa yang tulen akan melahirkan amal yang berterusan bukannya bermusim.

Puasa Sunat Syawal: Simbol Komitmen Terhadap Taqwa

Salah satu bentuk pembuktian taqwa dalam bulan Syawal adalah dengan melaksanakan puasa sunat enam hari. Rasulullah SAW bersabda:

"Sesiapa yang berpuasa Ramadan, kemudian diikuti dengan enam hari dari bulan Syawal, maka dia seolah-olah berpuasa sepanjang tahun." (Riwayat Muslim)

Puasa sunat ini bukan hanya bernilai dari segi pahala, tetapi juga sebagai manifestasi kesungguhan meneruskan disiplin Ramadan. Ia membuktikan bahawa seseorang itu tidak hanya beribadah kerana kewajipan, tetapi kerana kesedaran dan kerinduan terhadap nilai spiritual puasa.

Palestin-Manifestasi taqwa dan ujian buat ummah

Antara tanda seseorang itu beriman adalah apabila ia prihatin dan mengambil berat terhadap nasib saudara seagamanya. Ibarat pepatah Melayu, cubit peha kanan, peha kiri terasa sakitnya juga. Bertepatan dengan sabda Rasulullah SAW bermaksud;

"Mukmin dengan mukmin yang lain umpama sebuah bangunan, sebahagian mengukuhkan sebahagian lain." (Riwayat Muslim)

Hal demikian merupakan tuntutan agama dan syiar persaudaraan sesama Muslim. Para salafussoleh telah menunjukkan teladan terbaik bagaimana menjadi pelindung kepada saudara seagama yang lain, hinggakan mengisytiharkan perang terhadap musuh-musuh Islam yang sengaja mengganggu umat Islam yang lain. Apa yang berlaku ketika ini terhadap saudara seaqidah kita di seluruh dunia khususnya di Gaza dan Palestin adalah manifestasi terhadap sejauh mana kesempurnaan iman kita. Adakah kita

ambil tahu mengenai penderitaan mereka? Penganiayaan dan kezaliman yang sangat dahsyat dilakukan puak zionis dan sekutunya terhadap mereka? Adakah kita menghayati penderitaan saudara kita di sana dan setakat mana sumbangan yang telah kita usahakan? Persoalan-persoalan ini perlu dijawab sebelum kita dipanggil menghadap Allah yang maha teliti hisab-Nya dan dipertanggungjawabkan atas segala kecuaiian dan pengabaian kita terhadap nasib saudara seagama kita.

Kesimpulannya, Syawal adalah medan penilaian diri. Syawal bukan titik penamat ibadah, tetapi titik permulaan untuk menyemak dan menilai tahap ketakwaan. Ia adalah fasa pembuktian, di mana seseorang Muslim menunjukkan sama ada dia sekadar berpuasa secara fizikal, atau benar-benar berubah menjadi insan yang lebih bertakwa. Dr. Yusuf al-Qaradawi menyatakan:

"Tujuan ibadah adalah untuk mengubah manusia menjadi hamba Allah yang sebenar. Maka jika Ramadan tidak merubah perangai seseorang, maka itu bukan kemenangan, tetapi kegagalan."

Umat Islam sewajarnya menjadikan Syawal bukan hanya sebagai pesta perayaan, tetapi sebagai platform untuk memperkukuhkan hubungan dengan Allah dan sesama manusia. Dalam suasana gembira Aidilfitri, harus diingat bahawa kemenangan sebenar ialah apabila seseorang berjaya mengekalkan nilai Ramadan sepanjang hayatnya. Sepertimana yang pernah dinukilkan oleh Ibn Qayyim al-Jawziyyah;

"Puasa sejati adalah puasa yang menjadikan kamu lebih taat selepasnya."

Justeru, marilah kita jadikan Syawal sebagai fasa muhasabah diri dan pembuktian istiqamahnya kita mencari keredhaan Allah SWT. Bukan hanya gembira dengan pakaian baru, tetapi lebih penting, dengan jiwa baru yang lebih taat, lebih bersih, dan lebih bertaqwa...**inshaAllah.**